



Buna cursa per Curdin Perl (nr. 27) cun il 12avel post.



Ilario Andri, il president dal fanclub Dario Cologna.

Per intgin temp ina consternaziun

Fanclub Dario Cologna

DA GION NUTEGN STGIER / ANR

■ Ina quietezza, suenter la crudada da Dario Cologna, tar ses fans che han persequità da cuminanza la cursa da 50 km en in hotel a Cuira. Er senza la terza medaglia als gieus olimpics en tuts ventiraivels e sa legran da beneventar oz lur idol a la piazza aviatica a Kloten. Suenter sias duas victorias en las cursas da 15 km e da 30 km era *Dario Cologna*, il passlungist grischun, in dals gronds favorits per gudagnar la cursa roiala, quella cun ina distanza da 50 km tar ils gieus olimpics a Sotschi. Cun betg esser preschent il fanclub dal Jauer a Sotschi han *Ilario Andri*, il president dal club, ed intgins fans organisà in uschenumnà «Public Viewing» e pussibilità als fans da guardar cuminaivel la davosa occurrenza da passlung tar ils gieus olimpics en Russia. Bunamain 40 fans èn lura vegnids dumengia en damaun a las 08.00 en l'hotel Trais Retgs a Cuira per tegnair ils poleschs per lur idol. In'ura e 44 minutas han els già la speranza che Dario Cologna turnia da Sotschi cun trais medaglias e lura è stà a fin il grond siemi. Il victur dubel era sin ils chaltgogns a ses concurrents e sin la meglra via da gudagnar ina medaglia cur ch'el è crudà e schizunt rut in ski. Per in pli lung temp han ses fans preschents a Cuira chattà nagins plets cun esser fitg consternads. In fan ha consolà l'auter e tuttina hai dà bler applaus cura che Dario Cologna è vegni a l'arrivada.

Da Zug, Schaffusa e Turitg

Naturalmain è er *Ilario Andri*, il president dal fanclub da Dario Cologna, stà per in mument senza plets suenter la disfortuna da Dario Cologna. El ha er manegià ch'il Jauer avess già grev da gudagnar ina medaglia. «Jau sun betg uschè persvas ch'i vess tanschi oz per Dario da far la terza medaglia», ha ditg *Ilario Andri*. Ussa sa legran el sco er ils 600 commembers dal fanclub da retschaiver oz lur idol a la piazza aviatica a Turitg. Remarcabel è dentant tuttina che preschents eran a Cuira fans fidaivels da Dario Cologna, ch'èn vegnids da Zug, Schaffusa e da Turitg aposta en noscha chapitala per persequitar da cuminanza cun ils fans grischuns la cursa da 50 km. *Marc Aschwander*, da Turitg, in dals fans da Dario Cologna, ha manegià che blers fans hajan renunzià da far adiever dal «Public Viewing» en l'hotel Trais Retgs a Cuira er pervia da l'aura magnifica ed er cun avair lieu la cursa da 50 km a Sotschi uschè baud la damaun. Surstads èn ils preschents dentant er stads che cun *Alexander Legkov*, *Maxim Vilegzhanin* ed *Illia Chernusov* han trais indigens gudagnà las medaglias. Unisono han ils fans da Dario Cologna ditg che *Alexander Legkov* saja in meritaivel victur, dentant il grond star saja e resta lur idol Dario Cologna. Questa saira a las 19.00 turna il victur dubel da Sotschi e da la partida a l'eroport da Kloten vegnan er ad esser blers fans per beneventar en plaina dignitad noss «Dario il Grond».



Persequitada è la cursa vegnida sin ina tenda gronda en la sala da l'hotel Trais Retgs a Cuira.



Fans da Dario Cologna ed er stads a la concorrenza èn Pia e Viktor Buchmeir da Cuira.



Fidaivels fans da Dario Cologna èn er Paul Sidler da Zug (san.) e Röby Hunziker da Schaffusa.



Persequiteschan cun tensiun la cursa: Jon Domenic Parolini e ses figl Romedi.

FOTOS G. N. STGIER



Marc Aschwander da Turitg, in dals organisateurs dal «Public Viewing», ier a Cuira.



Er per Adriano Iseppi, l'expert da passlung tar SRF, è la crudada da Dario Cologna stada in culp.